



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 6

Yangia anidakangma :

f Tir Yimym

Instagram tiryimym@aolima

YouTube tir yimym

TAPAK 8

Ni Kuki-Zo MLA tem assembly session-i jaoktsü: CMBiren

World No. 1 Jannik Sinner Paris Olympics nung masayatsü



VOL. XXI ISSUE NO. 283 (ADOK 283) DIMAPUR ROGONÜ (FRIDAY) CHITENI (JULY) 26, 2024 ₹ 5.00

## Cyber security ya tangsa tongtipangba kumogo: Advisor Sethrongkyu

**Kohima, Chiteni/July 25 (TYO):** Nagaland Advisor, Information Technology & Communication, Economics Statistic & Evaluation, Sethrongkyu Sangtam-i tanü lima nung cyber security ya tangsa tongtipangba kumogo ta ashi.

Capital Convention Centre Kohima nung anogo ana National Conference on Cybercrime, Digital Forensics & Intelligence sentong Brehostibarnü tenzükdang sentong akhumdong ka ama jembidang, asen takum online den tali sendaktepa akumer asinung asen digital safety indang tebilemstüa tanen makai ainer, ta Sangtam-i ashi.

"Iba tebilemstü yagi asen national security, rongsenketzung aser nüburttem nem timtem agütsüsü," ta pai ashi.

Cyber security ya technical tebilemstü ka dang masü, ibai linük asoshi teinyaktsü mapa tongtipang ka lir aser sorkari digital environment tajung agütsüsü asoshi bendanga agütsür inyaker, ta pai ashi.

Ajisüaka cyber security agütsüsü ya sorkar indang mapa kisung masü, yangi nisung ajaki shilem agütsü nungdaker. Industry lenir, academia, civil society lungjemer tamang katettsüa digital environment yanglutsü atema inyaktsüla, ta Advisor Sangtam-i ashi.

"Cyber security ya tanen makaba lenmang ka lir. Yangji timtem aliba ya mapang shia melenshir, anungji item tayongzüka tasen azioktetsüsa asen tasa melenshitsuila," ta ashi.

Iba sentong nung Advisor Sethrongkyu Sangtam-isa Kamaljeet Kaur Muni aser Paathik Muni nati züluba "The New age of Privacy - Decoding the Digital Personal Data Protection Act 2023" kaket sayaja liasü.

Iba sentong ya Ministry of Electronics and Information Technology (MeitY), Government of India kübok National Institute of Electronics & Information Technology (NIELIT) Kohima ajanga Nagaland Police aser

## BIS License medeni tajemtsü tzü mayoktsüla: H&FW

**Dimapur, Chiteni/July 25 (TYO):** Packaged Drinking Water (PDW) yanglur aser ayoker (Manufacturers/Suppliers) tem BIS License medeni iba maparen inyaker, koba FSSAI License/Registration atema apply asü dang renema alitsüba license ka lir, ta Department of Health & Family Welfare ajanga sangdong ka nung metetdaktüsü.

Tzü tajung aser temürek ajemtsü ya meimchir temeden lir aser temang anema alitsü atema tongtipang, aser customer nem tzü temürek, tajung agütsüsü ya PDW manufacturer/supplier mapa lir, ta ashi.

Food Safety and Standards (Prohibition and Restriction on Sales) Regulations, 2011 indang

Department of Information Technology & Communication den lungjemer ayongzüker aser United Service Institution of India-i yarir.

Academicians, industrialists, policy yanglur, sorkar ketdangsiir, intelligentsia, police tanishir aser public prosecutors tem sapang ka nung lungjemdakja cyber crimes anema raratsü aser national security tashi itshitsü asoshi tasa balala nung jembishinü akatsü nükjidong nung iba mungdang ya ayongzüker.

Iba mungdang nung o jembir 20 jungnüai digital forensics, cyber security, emerging cyber threats aser cyber laws amala onüktem nungi jembitsü.

MeitY indang Secretary S. Krishnan-i virtual yimya nung New Delhi nungi iba mungdang nung adener den jembidang Ministry ajanga aser talisa NIELIT ajanga North Eastern Region nung digital tsütsü telemsa adoker aliba nung apu alatsü atema aser region nung digital service tajungba kumdaktsüsü atema project balala inyakba indang ashi.

Linük nung NIELIT centres 50 aliba nungi digital gap nung apu alatsü atema centres 20 jungnüa North East aser hill states nung rangloker lir, ta pai ashi.

Tanü linük ka ama India-i kidanger tem den külemi tebilemstü tasak ka ajurua aliba aser lendong tulu alibaji cyber security ya lir, koba taoba mapangbo meliasü, ta ashi.

Iba atema ajaki level ajak nung cyber hygiene sülen kumdanga anidaktüsüla aser tesem ajaklen IT operations den sendaktepa aliba networks aser servers akangshitsuila, ta Krishnan-i ashi.

"Asenoki sorkar inyakyim nung IT operations tali amshir asinung sorkar mapa inyaker tali training agia cyber security atema temulung agüja inyaktsü nungdaker," ta ashi.

Krishnan-isa iba sentong nung shilem ka ama "Empowering Police Personnel and Government Officials of NE States through IT and Cyber Security Training" project semzükja liasü.

Regulation 2.3.14 (17) aser (18) nung "Bureau of Indian Standards Certification Mark (BIS)" medeni shingaiia Packaged Drinking Water (PDW) aser Mineral Water (MW) meyanglutsü, mayoktsü mesüra ayoktsü atema mesayatsü," ta shia lir.

Anungji PDW suppliers ajanga dang kechi südir süaka BIS license ya alitsüla ta metetdaktüsü. Maneni BIS certification medeni danga state nungi PDW/Mineral Water bener aita state nung ayoktsü memelar, ta Department ajangasa metetdaktüsü.

Item totuyuba sülen manidaker nem Food Safety & Standards Act' 2006 indang Section 58 aser 63 kübok temerenshi alitsü, ta sangdong ajangasa ashi.

## Langpangkong yimtsüngtemi Highway junga inyaktsü mepishir



Mokokchung district kübok National Highway 2 nung Tuli aser Unger na tsüngda tawa nisungtem timtemba noksa kar angur.

**Dimapur, July 25 (TYO) :** Mokokchung district ajanga National Highway 61, tangbo National Highway no. 2 kümtsüogo, iba lenmang yagi Assam, Nagaland, Manipur aser Mizoram state pezü ajanger aser Nagaland nunga Mokokchung district nungi tenzüka Wokha aser Kohima district ajanga tesemtem nung 2 lane küma ulushia yangludagi.

Iba National Highway 2 nung Mokokchung district kübok tang Tuli nungi Mokokchung tashi nung tesem kar nung teinyakdak lir aser item tesemtem nungji aiben lishi aser auyi agi tesenzü majung küma senzüsenpongertem timtem tulu ajuruba ngua Langpangkong nung iba lenmang agi ajanga yimtsüng pungo Unger, Akhoya, Changtongya, Yaongyimsen aser Merangkong yimtem nungi yimteni lenmang yanglur KKB telok dang mapang shitak nung lenmang tasazük shitak renemtsü asoshi mepishia metetdaktüsüogo.

KKB telok yagi Tuli aser

Unger na tsüngda iba NH 2 nung kilometer 185 nungi kilometer 220 tashi kilometer 35 amshia 2 lane küma inyaktsü mapa meshizüka lir. Ajisüaka, aiben Tuli aser Unger na tsüngda lenmang tusar ali tazü lendi nung yutsüba agi tzünglu arudang lishi kümer gari mejajateter aser anü apudang auyi agi kecha mangu pongbanger ta nübortem ola madoki kanga timtem ajuruba ajangshir aser angur. Iba timtemji paidoktsü atema senzüsenpongertem aikati Tzüsangra apu nungi Asangma aser Kelingmen ajanga Chuchuyimlang leni atur aser yamaji taludanga Chuchuyimlang among nungi Kelingmen ajanga alur, saka iba lenmangjia anepalu asüba lenmang masü, anungji aiben timtem ajurur, anungji lenmang talangbalen süaka Longjang len nungi Impur lenjem ajanga dang jajar. Iba ama timtemji majurutsüsa lenmang yanglurtemi lenmang teyangludakba tesemtem nung senzüsenpongertem timtem melii

jajatetsüsa lenmangji junga yutsütsüla ta Langpangkong nung yimtsüng pungo nung jagi Village Council nung mendenbuba pungoi tezüluba nung KKB nem temepishiba ka agütsüogo.

Langpangkong ajanga National Highway 2 ulushia yangluba mapa nung ya Langpangkong nungertemi lenmang shitak junga yangludaktsünüba agi alimenok (land compensation) kecha magii inyadaktüsü. Iba denji mapa shitak junga inyadaktüsüba agi Langpangkong Tzükong Mungdang-ia Road Co-Ordination Committee ka shima reprangdaktüsü. Iba Committee yagi mapang shia lenmang yanglurtem ajurua mapa shitak inyaktsü ajungshir.

Item yimtsüngtemi mepishibaji KKB-i angaa, tang nungibo senzüsenpongertem lenmang tom nungi meyiptsüsa mesüra amang agi sangwa küma lenmang nung atatsüsa mataloktsü imlar.

## Mokokchung nung AKM-i ILP makartem apu

**Mokokchung, July/Chiteni 25(TYO):** Ao Kaketshir Mungdang Survial Mokokchung mapatong dak ajemdaker July 24 nü Mokokchung nung bendanger tejangja kuli kakat makartem lahdanga bushitsükdangba mapang nung kuli kakat peria makartem parnok 7 tashi apu aser parnokji meyipa yoktsü admistration aser police nem agütsüogo.

2007 küm nungi tenzüka Ao Kaketshir Mungdang-i "Survival Mokokchung" mapatong nung ajemdaker bendanger asen limai nungoka aitagti tim mesü alirtem talisa tejangja kuli kakat ILP makartem mita bushitsü tenzüker aser ita 6 shia AKM-i Census Card ka agüja inyaka odagi.

July 24 nü AKM-i mita aoba mapang nung kuli kakat peria makar par 7 ya pur kelen AKM kilem nung AKM Tir Sb.Lanutoshi Aier- osang zülur dang ashiba agi parnok 7 ya ILP makar apusaka ano 100 bo ILP tatakzük mapang süir (expired) aliba apu ta ashi. Parnok 100 rongnungji karbo ILP maparenbo inyaker saka Mokokchung nung

ILP Nodal Officer station nung mali Kohima nung training ka nung adener asüba agi parnok ket nung ILP shitak maliba putetta AKM Tir-isa metetdaktüsü.

Bendangertem Mokokchung telungi aita mapang nung parnok ket nung bona alitsüba kakat kuli tejangja meliaka administration ILP odang agütsüba ngutetogo, anungji administration-i ILP magütsükdang tamasa kuli kakattem jung junga reprangtsü nungtakerta administration teinyaktsü ka kanga dang khuret süa metetdakja ashi.

AKM Tir-isa asen lima nung arua alitsü asoshi arurtem shinga menokdang, asenoki shinga anema tamajung bilema mal,i saka asen limai aruagi alitsü asoshi parnok ILP nungtaker, bendanger shirnok asen lima nung mapa inyaktsü asoshi asen nüburttemi anir arur aser parnokji asen nisung akhum nung ayur , anungji iba ama maparen nungji asen nisungtemi talisa kibur jagi(Gurantor) parnok ILP-ji teti renew sütsütsüla, aser iba den külemi kuli makartem putetra

tekaraba nung administration aser AKM metetdaktüsüla ta shisem. " Asenok nisungi ILP renew asütsü asoshi bendanger dang sen 500 meshili ILP maparenji inyaktsüla asüba osang metet,iba ama mapa jagi asenok district tentung menüktüsü, anungji AKM-i item ama tim masüba mapa inyaker 3-bo jangjaogo, parnokji AKM ajanga jaoker ILP Branch nem aser Police nem tapet mapa inyaka temerenshi agütsükdaktüsü asoshi agütsüsü aser ano iba ama mapa inyaker AKM-i maneni bushitsüta AKM Tir-isa metedaktüsü.

AKM Tatong Tir Sb.Onenpong shiba AKM nung Survival Mokokchung mapatong nung tongti lir pai-a olen ka nung bendanger kuli tejangja makai nungoka aita aliba ya Naga nung senso ajaki kanga dang khuret süa bilemstüla,parnok nungoka aita aliba ya ajanga tarutsü anogotem nung timtem aika ajurutsü, anungji administration aser nüburttem ajaki ILP mapatong ka kanga ret reta benshia inyaktsü kanga topngtipangta ashi.

## Polytechnic asem nung Advisor Temjenmenba-i teburtem hostel asem lapoktsüo



**Mokokchung, 25th July (TYO):** MLA & Advisor to CM for Transport & Technical Education Department, Temjenmenba-i Government Polytechnic Kohima (GPK), Khelhoshe Polytechnic Atoizu (KPA) aser Government Polytechnic Tsunazho Chetheba Phek (GPTCP) tem nung 25th July 2024 nü tebur hostel asem Directorate of Technical Education, Kohima nungi online (virtual mode) ajanga lapoktsüo, ta osang ka ajanga

metetdaksü. Item hostel lapoktsüo dang Director, Technical Education, Officers, Principals aser department nungi faculty-tem densema liasü. Hostel ana (GPK & KPA) ya CAFES-AICTE nungi teyaria ngua yanglu aser hostel kaji (GPTCP) state sarkar senbong nungi yangluba lir.

Item hostel lapokja jembidang Advisor, Temjenmenba-i senotsü teyari agütsür teloktem aser state

sorkar dang kaketshirtem shisaliok satema angazütsüsa nungdakbatem peritsütsüsa teyari agütsüba asoshi pelaba metetdaksü.

Pai faculty-tem dang state aser central sarkari nungdakbatem agütsüba amaji item maongkatem agia kaketshirtem nem akok tashi education agütsüba nung tamakok maludaksüi pei tata mapa shitak inyaksü ajungshia liasü. Iba ama nungdakbatem tarutsü anogotem nunga inyaksü tebilemba aliba paisa shisem. Paisa contractor-tem dang sarkar nungi senotsü tangutsü tim menguaka, department den amalitepa item hostel-tem lapoktsü melaba asoshi pelaba lemsatop.

Item hostel shia nung nisung 40 mejangtetsüsa (40 Bedded) yanglua kar aser kaketshirtem kecha tim metemi satemsatema shisatsü angazüktetsüsa metameyangtem kanga junga yanglua lir, ta osang ajangasa metetdaksü.

## Free Diagnostic Services training agi

**Dimapur, Chiteni/July 25 (TYO):** Laboratory Technician tem atema free Diagnostic Services dak sendakba nung anogo ka atema training July 25 nü Directorate of Health Family Welfare, Kohima Conference hall nung agiogo.

Sentong nung o jembiba mapang North Eastern States atema Regional Resource Centre Director Dr. Raj Prabha Muktan-i, Nagaland nung health care system dak sendakba nung tenung asangtsü langa aliba kaji health care sector communitize asüba ya asütsü, koba linük nung mezüngbuba lir, ta ashi.

Laisa, PHC, CHC aser district hospital tem kar kanga junga inyaksangshidar saka diagnostic centre tem jenjang ajungkettsü nungdaker, ta ashi. Linük nung health sector dak sendaka aliba department tem

melenshidar aser diagnostic service tem ajungketshia tajungba küma yanglushitsü nungdaker, ta lai shisem.

Nagaland nung nütsünyongsük shilem 70 yimdak yimtsüngtem nung alir ta shia, lai Diagnostic service tem nüburtem kishizüing tonga bener otsütsüla ta ashiba den Lab technicians tem dang mongintem den sadem sadema sensaksem akatsü ajungshia liasü.

Lokti pela agizükba o jembiba mapang Health & Family Welfare Principal Director, Dr. E Motsuthung Patton-i, health care infrastructure system tashi itshitsü, facility tem jenjang ajungkettsü aser treatment tajung agütsütsü aser nüburtem tali tajungba anepalutetsü atema medical professionals

tem tali tajungba arangtetsütsü tang kanga nungdaka kümogo, ta ashi

Kasa mapang nung BMEMP & FDSI indang State Program Officer Dr. Mereninla Senlem-i metetdaksü aser Mission Director NHM, Dr. Akuo Sorhie-i tepela o jembia liasü.

Laboratory Technicians tem atema free Diagnostic services dak sendakba nung training ya National Health Mission aser Regional Resource Center for North Eastern States na longjemer ayongzüka liasü.

Technical session nung Haematology clinical pathology, Sample collection, internal quality control, overview of test under Biochemistry, Strengthening of Lab. Services aser Laboratory atema EQAS amala onüktem nung tangazükba agütsüo.

## KMC aser CTC atema nomination asoshi osang sangdongogo

**Dimapur, Chiteni/July 25 (TYO):** Department of Municipal Affairs, Nagaland, Kohima-i osang agütsüba aser Nagaland Municipal Act, 2023 kübok section 10 (3) aser section 22 (4) nung aliba provision dak ajemdaker Kohima Deputy Commissioner Kumar Ramnikant, IAS-i, Kohima Municipal Council atema züngsem pezü aser Chiephobozou Town Council

atema züngsem ana nominate asütsü metetdaksüo.

State tenung nung item nomination tem agizüktsü atema nonglokja aliba ketdangsür ka ama ken o dak sendaka alirtem dang candidate tem tenung Deputy Commissioner, Kohima nem August 5 nü tashi nungbo agütsütsü metetdaksüo, koba tenungdakba telemteba agitsü atema sorkar dangi abentsü.

## 'Women Centric Legislations' awareness sentong agi

**Dimapur, Chiteni/July 25 (TYO):** Administration aser District Hub for Empowerment of Women (DHEW), Kohima na longjemer 'Women Centric Legislations' dak sendakba nung awareness session ka agiogo.

Iba awareness sentong ya July 25 nü TM Government Higher Secondary School, Kohima nung agia liasü.

'Women Centric Legislations' dak sendakba nung o jembiba mapang Advocate Thejasenuo Vitsu-i, India nung tetsürtem temeden wazüka toktsüba constitutional article balala indang metetdaksü. Laisa, Protection of Women from Domestic Act, 2005, Sexual Harassment of Women at Workplace (Prevention, Prohibition and Redressal) Act, 2013, Medical Termination of Pregnancy Act, 1971, Equal Remuneration Act, 1976 aser tetsürtem kümzüka toktsüba aser temeden

agütsüba Act balala amala tetsür dak sendakba nung ozüing aser act balala indang metetdakja liasü.

Item act aser temedentem den bendenloksema lai, tetsürtem jenjang ajungkettsü atema scheme balala benoker aliba indanga metetdaksü. Laisa Juvenile Justice (Care and Protection) Act, 2000 (Amended in 2015) aser Protection of Children from Sexual Offences (POCSO), Act, 2012 amala act, koba ajanga India nung tanurtem kümzüka toktsür, item indang rasa ashi.

Maneni Vitsu-i, tetsür aser aiür chanutemi parnok ajangzükdaksütsü atema sorkari agütsüba maongka aser temedentem jangja alitsü koda tongtimbang iba indang lemsatopa liasü. Iba sentong ya Gender Specialist, DHEW, Kohima Kesoneinuo Kense lenisüba nung agia liasü.

## Horticulture Dept nem national award agütsü



**Dimapur, Chiteni/July 25 (TYO):** Nagaland sorkar kübok Department of Horticulture nem tawa Pragati Maidan, New Delhi nung tembangba International Agriculture and Horti Expo nung 'Promotion of Best Horticulture Farming and Products' atema National Award agütsüo.

Iba sentong ya NNS Media Group-i ayongzüker aser July 20 nungi 22 tashi agiogo, kong linük nung agricultural aser horticultural terenloktem saya liasü.

Department tenung nung ketdangsür asem aser Entrepreneurs Associates tenung nungi representative kati iba sentong nung shilem agi, aser iba ajanga Horticultural temaba

jenjang tongdaksütsü atema bendanga agütsür aliba aser telungjem tanüla sayuogo.

Department-i state nung tsünütetba chiyongtsütem sayua liasü, kong Perilla seed oil, Ginger powder, Dry Naga King Chilli, Sumac Powder, Candied Mango aser Plum nunger densema liasü.

Department-i s a , aluyimertem indang organic product tem ajungkettsütsü nükjidong nung Chayote, manü, mapu, mersü, Large Cardamom, Dragon Fruit, jiru, Plum, Pumello, entsülashi amala süngjangtem sayaogo. Naga Tree Tomato, Naga Cucumber aser Naga King Chilli ta GI-tagged chiyongtsü asema iba expo nung sayaogo.

### GOVERNMENT OF NAGALAND DIRECTORATE OF HEALTH & FAMILY WELFARE NAGALAND: KOHIMA

NO.DHFW-21/FSSA/BIS/13/2021-22/274-79

Dated: Kohima the 25th July 2024

#### NOTIFICATION

It has come to the notice of the undersigned that many Packaged Drinking Water (PDW) Manufacturers/Suppliers are functioning without BIS License which is a precondition to apply for FSSAI License/Registration. Consumption of clean and safe drinking water is a human fundamental right which is crucial in maintaining good health, and it is the responsibility of the PDW manufacturer/supplier to provide clean, hygienic and safe water to its customers.

Regulation 2.3.14 (17) and (18) of the Food Safety and Standards (Prohibition and Restriction on Sales) Regulations, 2011, states that "No person shall manufacture, sell or exhibit for sale, Packaged Drinking Water (PDW) and Mineral Water (MW) except under the Bureau of Indian Standards Certification Mark (BIS)". Accordingly, all the PDW suppliers are hereby informed that BIS license is mandatory irrespective of the annual turnover. Further, any import of PDW/Mineral Water from outside the state without BIS certification is not allowed for sale within the state.

Failure to comply with the above guidelines will attract penalty under section 58 and 63 of Food Safety & Standards Act' 2006.

Sd/-

(SHRI. V. KEZO)

Commissioner of Food Safety and Commissioner & Secy.  
to the Govt. of Nagaland.



### NAGALAND HEALTH PROTECTION SOCIETY

CMHIS (EP) nungi tajangzük angutsü purtem shiba- i sen agutsu-a treatment agiogo, sen meyipa meshitsü atema nungdakba temetetsütem den kaketem ajak agütsür külen koma asütsü ? CMHIS (EP) nungi tajangzük angutsü purtemi treatment atema sen endokba meyipa meshitsü atema temetetsütem ajak den kaketem kodang agütsüdir, maparentem yamai inyaka aotsü :

#### Step 1 -

- a) Tajangzük angutsü purtemi sen meyipa angutsü atema kaket aser bill nungdakba ajak portal nung agütsür külen, iba repringba doctor-i item kaketem aser sen meyipa angutsü atema meshibaji repringdangtsü.
- b) Iba repringba doctor jagisa shiranger anepaluba mozü ki den itemji jangjashiteptsü.
- c) Itemji kodang jangshitetdir, iba Health Benefit Packages nung aliba ama iba maparen repringba doctor-i inyaka aotsü aser tatemsa jangjashiteptsü atema SHA jangjashir dangi yoktsü.

#### Step 2 -

- a) Iba maparen repringba doctor-tem nungi senotsü meyipa meshiba kaketemji agizüker külen, State Health Agency (SHA)-i itemji repringshitsü.
- b) SHA jangjashiri senotsü meshiba amaji agizüker külen -
  - i) Senotsü meyipa meshibaji 2nd November 2022 nungi 31st December 2023 tashi nung shiranger anepaluba indang süra, iba senji tajangzük angutsü pur nem CMHIS Corpus nungi agütsütsü.
  - ii) Iba senotsü meyipa meshibaji November 2022 jakdang shiranger anepaluba indang süra, iba senji tajangzük angutsü pur nem pei pei department-i agütsütsü.

#### NOTE:

Iba tajangzük angutsü temsüa alirtem shirnoksa senotsü endokba meyipa meshitsü atema meinyaktepi ali, tekaratiba nung inyaksü mepishir. Iba Claims Reimbursement mapa yabo ONLINE ajanga dang inyakteper.

#### Online nung item nung ya repringa yokangma :

Iba mapa kodal inyaksu, yangi repringang (Claims Reimbursement User Manual) <https://cmhis.nagaland.gov.in/category/user-manual>

Ya metetangma : CMHIS (GEN) nungi teyari angurtemi Reimbursement memeshitettsü.

Nungdak mapang item number nung phone mesüra WhatsApp ajanga tongtepratepangma :

8880515011 | 8880515012 | 8880515013 | 8880515014



## MULUNG NEN O



(Tasüba anogo – 16.07.2024)

Ozüi teti meima aliba asür S. Merinoknen ajungbena alima nungi piladang shirnokisa mangyim jashi lemsatepa sarasadem, nübu, rongsen aser ariabilem tesünep o agi onok mulung süngzükja yariogo, nenok ajak dang tebang agi meshitetba tepela tulu lemsateper. Talisa tenüng meshiang meliteta lokti item dang pelar:

1. Kosasanger Putu Menden Changtongya
2. Changtongya Baptist Church
3. Sub-Treasury Office Changtongya
4. NCRC Changtongya
5. Mangkotongmen Kidong Changtongya
6. Yimsüsür kinungtsür Changtongya
7. Timsur Farmers Club Changtongya
8. Changtongya Mopungsanger MPCS
9. Tamajangtsür Telungjem Changtongya.

Nenok temeim mapa onoki teti bilemettsü.

~ Temeim Kinungtsü, Chirnur, Anükabang & semchirtem.

## Maharashtra nung tzumetsung agi district aika kongshiogo

Mumbai, July 25 (Agencies): aliba tesemtem nungi nisungtem anitetsü, chiyungtsü, mozü aser Tang Maharashtra state kübok district aika nung tzumetsung lendong atalokba mapang Chief Minister, Eknath Shinde-i sorkar departments aser agency balala nungi ketdangser ajak dang lendong atalokba tesem nung teyari agütsüba aser kümzükba maparen nung shilem agiang, ta tuyuogo.

Bodhbar nungi tenzüka Brihostibar tashi tzunglu maneni aruba ajanga Pune yimti tamajungba kongshiogo. Chief Minister Shinde-i, “Ni NDRF, SDRF units, Army, Navy, Police, Fire Brigade aser Health Departments ajak dang parnok tsüngda amalitepa kümzükba maparen inyaksü tuyuogo. Pune dak sendakba nung ni army aser navy ketdangsertem den jembio. Nisungtem mekümzükteti aliba tesemtem nungbo helicopter amshia kümzütsü ni tuyuogo,” ta metetdaksü.

“Tzumetsung agi kongshia Maharashtra nung tzunglu dak sendakba lendong balala nung nisung pezü süogo aser Pune nungbo school ajak shibangdaksüogo. Talisa Pune yimti kübok Ekta Nagri aser Vitthal Nagar kiyongtem nungbo ki aika tzü agi metsungbangogo. Pune Fire Department-i rong amshia nisung aika kümzükdar.

India Meteorological Department (IMD)-i Pune nung ano maneni tzunglu arutsü, ta shia Pune atema ‘red alert’ sangdonga lir. Brihostibarnü National Disaster Response Force (NDRF) nungi team aseme Pune tesem balala nungi nisung aika kümzükdar.

Brihostibar anepdang Pune nung tzumetsung ajanga kidang nisung asem electric current agi puseta asü aser ka anentsüh agi anenbanga asü.

## Internship Scheme kübok lanur million 10 dak tema ajangzüktsü

New Delhi, Chiteni/July 25 (Agencies): Union Finance Minister, Nirmala Sitharaman-i Mongolbarnü Parliament nung Union budget 2024-25 sangdongba mapang nung Prime Minister’s package kübok mapa aser skill development ajungkettsütsü nükjidong nung sentong aika metetdaksüogo.

Item mapatong balala rongnung tongtibang kaji “Internship Scheme” lir, aser iba scheme ya lanur million 10 dak tema nem internships agütsütsü asoshi lir.

Lok Sabha senden nung Finance Minister Sitharaman-i, taruba küm pongu tsüngda lanur million 10 nem tongtibang company 500 nung internship maongka agütsütsü, ta metetdaksü. Lanurtem mapa manguba tebilemtsü ajema kümduksütsü nükjidong nung Centre sorkari iba mapatong ya benokogo.

2024 Internship Scheme kübok lanur million 10 nem

company tulutem nung agütsütsü aser skill practical work experience aser skill development maongka agütsütsü aser Interns nem ita shia stipend agütsüba den külemi senotsü teyari khen agütsütsü.

Iba scheme kübok interns nem ita shia stipend sen 5,000 agütsütsü aser sen 6,000 khen atema teyari agütsütsü. Iba scheme ya shilem ana lemsar benoktsü: mezüngbuba shilemji küm ana asütsü aser tanabuba shilemji küm asem asütsü.

Iba scheme kübok shilem agiba company temi interns training agidang indokba ajak agütsütsü, aser iba nungji Corporate Social Responsibility (CSR) funds nungi internship mapang indokba shilem 10 densema lir. Application inyakyim ajak online portal ajanga agütsü, ajisüaka tang tashi nungbo inyakyim tejangja mesangdong.

Iba scheme kübok shilem agiba company temi internship agirtem nem training junga lemzütsüogo.

## NASA Training atema India nunger astronaut ana shimogo

New Delhi, July 25 (Agencies): Taküm August ita nung Texas nung aliba NASA indang Johnson Space Center nung training agütsü atema India nunger astronaut ana shimogo, ta Indian Space Research Organisation (ISRO)-i metetdaksü.

Iba training ya India-US space mission to International Space Station (ISS) atema lir. Iba mission ya taküm küm tatembanglen tenzütsü. Training agiba sülen astronaut ana rongnung jagi ka shima mission nungji shilem agütsü.

Yaküm June ita nung Ato kilonser, Narendra Modi-i US semdangba mapang nung US Tir, Joe Biden-i India-US space

mission osang sangdonga liasü. Iba mapang nungji Biden-i, iba mission atema NASA-i India nunger astronauts nem training agütsütsü, ta metetdakja liasü.

Osangbenertem den jembidang Indian Space Research Organization (ISRO) chairman, Dr Somnath-i, “NASA-i maongka aliba nungi asenok nem menden ka agütsüogo. Commercial contract ka asü nungji asenoki tanga partners den tezüngzüktep agia aliba kübok inyaksüla. Onoki iba nungji ai-aura akar. Maongka aika mali. Asenoki menden ka angubaji US aser NASA nati asenok nem agütsüba ajanga lir,” ta metetdakja liasü.

केनरा बैंक Canara Bank SALE NOTICE **SPECIALIZED ASSET RECOVERY MANAGEMENT BRANCH**  
2nd Floor, Dee Bee Grande, 6 Mile, Panjabari Road, Guwahati- 781022, E-mail- cb7259@canarabank.com

E-auction Sale Notice For Sale of Immovable Properties under the Securitisation and Reconstruction of Financial Assets and Enforcement of Security Interest Act, 2002 read with proviso to Rules 8(6) of the Security Interest (Enforcement) Rules, 2002

Public aser talisa sen apur(tem) aser Guarantor(tem) dang, Secured Creditor dang mortgaged asüba aser tsünglanglen shia aliba kiojenji Canara Bank nung Authorised Officer-i agiadokogo aser iba kiojenji sen apur aser Guarantor dang nungi Branch of Canara Bank-i sentsüh alanzüktsü asoshi 30.08.2024 anogo nung “kong aliar yamaji” aser yangji aliba ajak” ayoktsü ta sangdonger.

Earnest Money Deposit (EMD) ji 28.08.2024 anogo nikongdang 4.00 ako tashi nung deposit asütsü.

Auction ji website: <https://ebkraj.in/> ajanga “Online E-auctioning” asütsü.

Auction anogo aser mapangji: 30.08.2024 nü anüngdang 11:00 ako nungi nikongdang 01:00 ako tashi asütsü.

(Ayokba maparen metembang tashi minute pongungo (minute 5) atsülangtsü).

Branch, sen apur/guarantor, liability, kiojen aser EMD osang tejangja, reserve price:

Sl. No.	(A) Name & Address of Secured Creditor/Branch (B) Name of Borrower / Partner / Guarantor	Brief Description of Immovable Property	(A) Total Liabilities (Rs.): (B) Reserve Price (Rs.): (C) EMD (Rs.): (D) Increment Amount (Rs.):
1.	(A) Canara Bank, Specialised ARM Branch, Guwahati 2nd Floor, Dee Bee Grande, Panjabari Road, Six Mile, Guwahati- 781022 (B) Borrower / Partner / Guarantor: SHINIHO KAKHETO JAKHALU S/o Shiniho Marble and Granite House, Purana Bazaar, Kohima Road, Dimapur, Nagaland, PIN- 797112	Land measuring 1 Bigha 02 Katha 10 Lechas (200ft * 180ft = 36000.00 Sqft) situated at Thilixu, 3rd Mile, Block- IV, Bye Lane 5 under Revenue Circle- Dimapur, Dist.- Dimapur, Nagaland in the name of Mr. Shiniho Kakheto Jakhalu. As per land allotment order Sl. No. 90 dated 25.05.2012 Bounded as under:- North: Approach Road, South: Fishery, East: Paddy Field, West: Holiheh.	(A) 73.07 Lakh (B) 121.00 Lakh (C) 12.10 Lakh (D) 0.50 Lakh

Iba sale atema telatetbatem osang tejangjaji agüja aliba Canara Bank indang website ([www.canarabank.com](http://www.canarabank.com)) nung link “E-Auction” nung angutsü mesüra Branch Head of Specialized ARM Branch, Guwahati, 2nd Floor, Dee Bee Grande, Panjabari Road, Six Mile, Guwahati, PIN- 781022 den mapa inyaka anogo mashie ka nung office mapang Contact No. +91-9971343295 ajanga tongteprateptsü akok.

Date: 22.07.2024, Place: Guwahati

Authorised Officer, CANARA BANK



## TIR YIMYIM YIMOBILEM (EDITORIAL)

DIMAPUR ROGONÜ, JULY (CHITENI) 26, 2024

### Ajak nübortem dak keta lir

**A**lima nung yimsüsürtema, Thomas Jefferson-i ashiba ama, nübortem dak alangang angutsü, kechiyong nübortemiang pei mesükba nung yimsüsürtem shimer, anungji yimsüsürtem jungra nübortemi onok junger ta ashitsüla aser yimsüsürtem mejungra yimsüsürtemji masü saka onok majunga ta nübortemi angatettsüla. Aji oda, tanü linük nung kasa National Highway Assam, Manipur aser Mizoram nungbo kanga junga yanglur saka Nagaland nungbo kanga mejungi yanglur ta asüba ya Assam, Manipur aser Mizoram nung alir nübortem ajungba agi lenmang yanglutsürtemia parnok nüken tsübua junga yanglutsür saka ashiko Nagaland nung kasa National Highway junga meyanglutetba ya asenok nübortem majungba agi lenmanga majung yanglutsür asütsüa akok. Assam, Manipur aser Mizoram nungbo lenmang yanglurtemi mapa tilaka danga meshitak inyaka ngura tetsür chanu kati asüyonga aji anema ola adoktsü, kechiyong aji parnok taküm piyong jajatsüba lenmang government-i sen teperi agütsür inyakdaksür ta lai meteta lir. Ajisüaka, Nagaland nungbo lokti telok ka tongtibang nungdak kati aoer ser nung lenmang yanglurtemi lenmang mejungi tusa yutsüba agi moutet mesüra lenmang mashi mashi ka yangluba agi timtema ajuruaka shingaia ola koka madoktsü, kechiyong asenokji timtem tarem aser tema nung masü tanemi sübokrem agi alitsü merangba nisungtem lir. Iba jagi asenok ya meteta aser memeteti asenoki sübokrem meyirijang ka agizüka agir saka lakh ka jenjang timatemer. Kasaji, Nagaland tasung government mozü ki tulu yangluja lir aser yangji temang shilem shia doctor kaka ayutsüba government sentong nungbo lir ser nung, district hospital nung surgeon mali, gynaecologist, medicine doctor aser tenük aser tebu doctor maliba dang masü X-ray agitsür aser azü tendangtsü purtema mali, nisungtem aneper masü saka talila shirangdaksür aser melamelaa aneptsüla kata majung kümdaktsür aser takar-makar ajak tangaleni yoker saka shingaia ola madoker. Aji oda, Community Health Center kar nungbo doctor ka kisüngi ajak repranger saka nübortem pelaa dang lir, kechiyong nübortem jakla yari mozü ki asoshia moatsütsü. Nübortem asoshi senotsü teyari agir magima arur saka nübortem ketbo tera agidang atonger aser tanungba ajakji parnok nem moatsüba lenirtem keti aoer, saka tera jagi nübortem tepelashi. Aji asenok. Kasaji asenok chirnurtem angati kaketshisatsü tajung angazükdak government kaketreju teperi lapokja lir aser tesayurtema tajung dang shimer yoka lir saka asenoki itemjia anepalu mesüteter. Aji oda, tanurtem atema yokba tagitarutsü ajak asenoki agiadoker aser timtemseta tanurtem ajak private school-i yoker. Iba tashiji asenoki asenoksasa asenok akoksatsüsa inyaker. Iba jagi asen chirnurtem angati kaketshisatsü tajung ngua tagidak akaba senso kaka akümtsü melena tatsüka timtemseta private school nung zünger taküm raksar. Itemji parnokksasa masü asenoki raksadaktsüba purtem lir. Kechi kodaser süboktem agiba chirnurtem tajung akümtsü ? Kechikodaser mapa meinyaki kibong mesüba kibong nungi tajung adoktsü ? Kasaji, arogoa nübortem majungba agi arogo majunger, kechiyong arogoi nübortem yanglu masü saka nübortemiang arogo yanglu ser nung, arogo nungertemi ochimashi, memeshi aser meindangba mapatem anema ola madoker. Aji oda, tanü asenok arogo aser mungdang-a asenok nübortem mesük, memeshi aser memerük kümogo, anungji arogo masü asenok nübortem merüktettsü nungdaker. Atangji, kecha tesüngmangtsü mali, asenok mesük asenok yimten aser asenok mesükba lokti aser arogo nung asenok pei ajung dang bilema asen senso mungdang adenshir aser arogo lokti senden alir. Itemji, jungjunga bilemdangra, amajok dang lir.

## OLEMSABANG

### LOKTI NUNG LENNIR KATI PEI KHURET ANGATETA TENZÜKTSÜLA

~ L.Kika Pongener.

*(Yashi adok nungi...)*

Ano temalen shisemba ama lennir karbo kecha khuret maka küli küptok dang tenzüka alitsü akok. Aji oda, tanü ama tashitemetet putu ka nung, lennir kati lokti asoshi khuret kecha maka...Pa/Ia arunudang arutsü, marunura marutsü, pa/Ia dennudang adentsü aser medennura madentsü ta züba-zübaa tenzükra, iba ama lennir jagi loktiji rajang kümdaktsütsü. Ano lennir karibo pei-i inyakba mapa dak alaka tangari inyakba mapa nungbo tajung majitetba lennir karbo lir. Ano lennir karbo pei sasa pei mapa makoker, saka tangar nema yimli magütsünuba lennir karbo lir. Yisu alima nung alidang pai Yihuda nunger lennir Farise-tem dang yamai ashi..."Nenok Farise anemsutem aiatai ! Kechiaser nenoki Kodak yimli nungi nisung shidanga-adoker; Kechiyong nenoki nenok sasaka mair aser tangar taitsü alibaa meidaktsür" (Mathi-23:13). Ano lennir karbo pei asoshi dang bilemba (Selfish/Ism) shisatsü adenba lennir karbo lir. Ni, ozü kimang, ozü sosem, ozü kin, ozü kidong...ta apia nubu-bo aika anidena ayu, saka ken o shilem agia nokdaka jembirbo mali. Lokti nung pei tebilemba/tangatetba shilem agia nokdaka mejembira, lokti nem tajangzük kecha magütsütsü. Aji oda, menden meka-a amenba agi dangbo lokti kaji tejakleni maotsü. Ata-a atongokba amaji shilem agia nokdaka jembitsüla. Lokti ka tashi aittsü atema tenzüker ajaki nungsen metsübui ochi nung tasü-ita nokdaka pei tangatetba jembitsüla. Lokti nung tenzükbaji teti-bo tepela danga masütsü, konang-nungsang danga masütsü, saka mapang kar nungbo nungsen-nungmen agitsüsa tensa tia ajurutsü. Arogo ka asünunga teti teka mah-dena, ken dena, lai zünga, sarasadema, tenung-sangtepa, longsotepa, benjongtepa dangbo malitsü, Yimden ka asünunga teti tachi-tajemtsü, taki-tarutsü lemsa-a, benjongtepa, longsotepa dangbo malitsü, saka ken o tasak tebilemetsü khuret arutsü. Atangji, loktiliba ajak nung teti konang-nungsang aser tepela dangbo masütsü, saka nungsen-nungmen agitsüsa ken o tasak arutsü. Mapang kar nungbo lokti raksatsüsa/lemsatsüsa tsüngsak-mepong tesashi agi onshitsü aser ken o teret alangtsüsa tensa mapang arutsü.

Anungji iba ama tensa tia ajurudang, lokti nung tazüngbur/tekolak kati pei tenzükbaba menden kümzüka meyutetra, nubur tsüngdang maaksu aser sentsüh asütsü. Tazüngbur aser tekolak dang masü, temedangertem/tenzükertema pei tenzükbaba lokti nung ken o tasak arudang, nungsen arudang, pei madak lennir toktsür moi tasü-ita nungittsüla. Lokti nung tenzüker shirnoki konang-nungsangbo aginur, saka nungsenbo maremer, ken o tasak arudangbo pei madak lennir menungiter aser pei tenzükbaba menden wazüka aser kümzüka meyuteter, iba ama lennir dangji lennir tajung ta majatsü. Atangji, tanü yimden, arogo aser loktiliba ajak nung tanishir |(Leader) asütsüba ya kanga temela-bo masü khuret tulu lir. Tanü putu ya tashitemeter putu asünung, koba-teka tashitemetet lir, patakaji khuret aser tebilemetsü ajurutsü. Atangji, tanü ya kanga dang tepenja putu ka asünungji, lokti nung meimplaba aser mekoktettsüsa tensa tia aika ajurutsü. Anungji loktiliba ajak nung lennir ajaki kanga shisa kaa, ajemalua tila kümer, Tsüngrem nungi shisatsü meshia loktiji anitsüla.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Dawid yimti nung kiojen ka ngutetba ajanga Laishiba otsü jangjar



**July 25, 2024:** Archaeologist temi David yimti nung küm 3,000 tejaklen aliba kiojen ka ngutetogo, aser ibaji ajanga Laishiba nung shia aliba otsütem jangjar.

Metre 9 talang kiojenji Yirusalem nung David yimti nung angu aser iba kiojenji Laishiba nung keta aliba kakat ana nung shia lir.

Tesüiba küm aika scientist temi David yimti ya ana kuma lemdangba kuli sayutsü meranger, aser tang iba kiojen ngutetba ajanga, atangji David yimti ana kuma lemdangba kuli jangjar.

Israel Antiquities Authority (IAA) aser Tel Aviv University na nungi archaeologist temi 'moat' ka ngutet aser ibaji David yimti aser Temple Mount aser Ophel araes tsungda lung atuba ajanga kumtetba liasü ta amanger.

Iba 'moat' ya Iron Age mapang nung tentetba asütsü akok. Iba mapang ya Laishiba nung Chubatem kakat aser Samul kakat züluba mapang nung liasü. Chubatem aser Samuel kakat na nung David yimti ana kuma lemdangba indang shia lir.

Israel Antiquities Association (IAA)-i, "Iba tebushitetba ajanga Jerusalem nung Ophel aser Millo ama tesemtem dak sendakba Laishiba puti otem indang asentenshir o lemteptsü atema maangka lapoktsür," ta metetdaksü.

Excavation Director, Dr Yiftah Shalev-i, "Jerusalem nung iba ama kiojen yangluba aser lung atuba ya Middle Bronze Age – küm 3,800 shi tejaklen liasü," ta metetdaksü.

"Iba ama ongken ya iba mapang nungji atu asü nungbo,

ibaji north tsütsülen nungi yimti kümzüksü atema liasü, kechiyong David yimti nung tashimaitba tesemji north tsütsülen dang liasü," ta paisa metetdaksü.

"Iba ongken ya First Temple aser Judah yimli mapang nung liasü (Aso 9buba BCE), anungji ibaji yimti south tsütsülen aser yimti tekalen nungi north tsungda mitsa ama yangluba liasü," ta paisa metetdaksü.

1 Chubatem 11:27 nung yimti ana kuma lemdangba indang shia lir.

Yirusalem nung mezüing meimchirtem alibaji Early Bronze Age (3500 BC) mapang nung liasü ta bilemer.

IAA Director, Eli Escusido-i, "Ano maneni tebushitetba balala ajanga Laishiba otsü dak sendakba tasen aika bushiteter," ta metetdaksü.

## Uttar Pradesh nung Khristantemi police dang security meshir

**July 25, 2024:** Uttar Pradesh nung right wing Hindu teloktemi Khristantem dang, nenoki anti conversion ozüing alema inyakogo, ta nenok nem tai tongloksütsü, ta amokmerenba sülen Khristantemi police dang security meshiogo.

Uttar Pradesh kübok Maharajganj district nung Khristantemi temepishiba shidi ka ajanga police tongti dang, right wing teloktemi Khristantem amokmerener, ta metetdaksü.

Temepishiba shidi nung sign süa alirtem rongnung Ram Lakhan-i, "Onoki tekümzüksü meshitsüsa akümer, kechiyong Bajrang Dal (Brigade of Lord Hanuman) züingsemtemi onok sarasadem sentong tagidak mapang nung arua timtem agütsür aser amokmerener," ta metetdaksü.

July 24 nü osangbener den jembidang Lakhan-i, "Kü adianu, Ram Uddesh-a July 14 nungi Maharajganj nung aliba jail nung puoka lir. Pai anti conversion ozüing alema inyak,

ta pa nem tai tonglokja jail nung puok," ta metetdaksü.

Nisung 50 shii Yisu Khrista tesayuba sülen anidaker, ajisüaka parnoki Khristan yimsübo magizük. Parnoki-a temepishiba shidi nungji sign süa lir.

July 23 nü Khristantemi temepishiba shidji Superintendent of Police nem agütsü.

Khristantemi ashiba agi, Bajrang Dal district president, Vivek Shrivastava aser pa den külemi inyaksemertemi Khristantem anema inyaksü, ta amokmerenogo.

Right-wing züingsemtemi Khristantem aser Khrista sülen anidakertem dak azüker, tetsürtem dak tim mesüi benshir aser Laishiba raksatsür, ta parnoki shidi nungji shia lir.

Bajrang Dal züingsemtemisa Khristantem dang, nenoki Tenla kidang mesüra pei kidang sarasadem sentong ayongzüka agira nenok dak azüksü, ta amokmeren.

Tang India nung anti

conversion ozüing benoka aliba state 11 rongnung Uttar Pradesh-a densema lir. Item ozüing kübok Hindu nungertemi Khristan mesüra Islam yimsü dangi meyipbaji ozüing alema lir. Nütsüing million 200 dak tema aliba Uttar Pradesh nung Khristantemi nütsüing shilem 1 den tajemba lir.

Nütsüing teimtiba aliba state, Uttar Pradesh nung tang BJP sorkar lir aser iba state nung Bajarang Dal aser Vishva Hindu Parishad (World Hindu Council) ama teloktemi Khristan missionary tem mapa anema nokdaker.

Police nem temepishiba shidi agütsüdang Khristantem meina aoer pastor, Vishal John-i, "Onoki tensa tamajung ka ajangshidar," ta metetdaksü.

John-isa, "District nung police tongtii right-wing teloktem anema inyaksü, ta onok dang nangzükogo, ajisüaka pai onok dang kidangbo sarasadem sentongtem ayongzüka magitsüla, ta tuyu," ta metetdaksü.

## ANOGO ABEN TSÜNGREM DEN

### Taitsüba Aser Angatetdaksüba

"Tsüngremi mulungba amato jashidaksübai, tanaben mesasatsüsa, tekümtet asoshi temulung meyipdaksür" (2. Kor.7:10)

Taitsüba aser kongshia aitba tatishitsü tajungtibaji Iskariot Yihuda aser Simon Peter lir. Aji süaka, Yihuda satani ashiochtsü. Pai Yisu ashiochtsü (Lk. 22:3-5). Kodang Yihudai pai inyakba bilemtet, pai kanga jashi aser pa sasa soseta asü. Pa soseta asübaji satani aitsüba asü Tsüngremi kongshiba? Ibai taitsüba, kechiaser pai pasasa tepset. Taitsüba jagi tasüba dangi anir; kongshia jashitaksüba jagi temulung meyipba aser taküm dangi anir.

Peteria Yisu menangzük. Nütsüingtem rongnung jembiba ama, ibai asüküm nungi tenzük; shiba tuluba asütsü. (Lk. 22:24-30). Asüküm ajanga Peteri satan nem' tetsüing ajemmetdak ka agütsü (t.31). Saka Yisui Peter asoshi sarasademtsü (t.32)

Peteri Yisu den asütsü nangzük. Saka Yisui pai Pa ashiochtsütsü ta ashi, aser aji atalok (Lk. 22:33,34). Peteri angateta aru aser jashi aser temulung meyip (Yn. 21:15-17). Kodang tejashi nung Tsüngrem nungi piladir satani na aitsür. Ibaji nokdangang. Saka kodang ne tejashi jagi Khrista den ajurutepdaksür aser ne tai nangzük aji Tanela ajanga inyakba. Khristai asenok tatidang ajak nung yarir (1 Yn. 2:1). Kibuba, Tebu matsüing dang onok aitsüba ajak nung nai kümzükba asoshi pelar.

## Myanmar nung Baptist lenir, Rev. Hkalam Samson jail nungi chiokogo



Rev. Dr Hkalam Samson

**July 25, 2024:** Myanmar/ Burma nung taoba mapang Kachin Baptist Convention (KBC) nung Tir, Rev. Dr Hkalam Samson July 23, 2024 nü jail nungi chiokogo, ta Christian Solidarity Worldwide (CSW)-i metetdaksü.

Khristantem temeden aser meimchir temeden atema inyaker, Rev. Dr Samson ya 2022 küm December 5 nü Mandalay International Airport nung lia mezüing apu. Pa Bangkok-i aotsü atema airport nung lia apu.

Pai ozüing alema nisung ayongden, linük tenüing menüksü aser kiralongra nung shilem agi, ta pa aija yaküm April 7 nü pa jail nung küm 6 puoktsü obendang agüja liasü.

National Amnesty kübok taküm April 17 nü pa Myitkyina jail nungi chioka liasü ajisüaka jail telatetbatem nung ajemdaker kasa anogo nungjiisa pa apu aser ki ka nung pua ayu.

Christian Solidarity Worldwide CEO, Scot Bower-i, "Rev. Dr. Samson chiokbaji CSW-i pelaa agizüker. Mezüingyongi pa jail nung mepuoktsüla liasü," ta metetdaksü.

Bower-isa, "Pa ya tashiyim mamshiba Khristan pastor ka lir aser pai meimchir temeden atema inyakba agi alimai pa akhümtsübur. Onoki Myanmar nung sepaitem dang pa aser par kibong tesünep nung aser tetsübu kecha makai lidaktsütsü atema mepishir," ta metetdaksü.

2019 küm nunga Dr. Samson-i taoba mapang US Tir, Donald Trump dang Myanmar nung lisopur minorities anema inyakba osangtem metetdaksüba atema Northern Command-i pa nem temerenshi agütsütsü meranga liasü, ajisüaka sepai tongti, Min Aung Hlaing tetuyuba nung pa anema benokba ken oji agien.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Takoker**

(n) takok angur nisung (winner)

\* Taküm nung takoker ka asütsü merangtsüla.

**Takoksa**

(adj) tesama, tajangzük mangu (loss)

\* Asen lima nung lenmang majungba agi takoksa kanga ajurur.

**OLONG PAITEP # 6856**

1						2				3
								4		
5		6				7				
8										9
								10		
					11		12			
		13								
14							15			
					16					

**TIPIEN**

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzük asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

**LANGTSÜNGLEN**

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

**OLONG PAITEP # 6855 TELANGZÜBA**

**TIPIEN :**

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.

**LANGTSÜNGLEN :**

- 1. Tai, 2. Asensor, 3. Tanü, 4. Kua, 5. Mitsüktsü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

**Agartala: MBB airport nem Int. jenjang agütsütsü MP-i mepeshi**

**Agartala, Chiteni/July 25** (Agencies): Tripura Lok Sabha MP Biplab Kumar Deb-i, union civil aviation minister dang Agartala nung Maharaja Bir Bikram (MBB) airport ya international airport jenjangi ajungkettsütsü aser immigration check post amenoktsü atema official osang takaratiba nung agütsütsü mepeshia metetdaksüogo.

Lok Sabha nung o jembiba mapang Tripura MP Biplab Deb-i, MBB airport ya Tripura nung primary aviation hub ka lir aser Northeast kübok state balala atema kikümtong tongtibang ka lir, ta ashi.

Pai Lok Sabha Speaker Om Birla nem iba temepishiba agütsü aser iba dak sendakba nung union civil aviation minister-i jenjang tapet agütsü ayongzuka liasü.

"2022 küm Ato Kilonser Narendra Modi-i, MBB airport nung terminal building tasemba semzüksüogo, kong domestic aser international passenger 1200 achaayangettsü," ta Biplab Deb-i

Tripura nungi MP yagisa, "facility nung check-in counters 20 lir aser airport nung Instrument Landing System aser ground lighting keta lir," ta ashi.

Pai ashiba agi, Tripura sorkari Agartala-Chittagong flight services achaayangtsü atema sen crore 18.85 intokogo aser ministry of finance-i 2023 küm January ita iba airport ya customs check-post ka ta sangdongogo.

Ajsüaka pai ashiba agi, immigration check post dak sendakba nung ministry of home affairs (MHA)-i tang tashi osang magütsü lir.

Pai, Speaker dang osang takaraba nung agütsüdaksütsü atema civil aviation minister aser MHA na tsüngda tongteprateptsü asoshi anepalutsütsü aser Agartala yimti nung MBB airport ya international airport ka ama sangdongtsüla, ta ashi.

Deb-isa, iba jenjang agiba ajanga Tripura nung aliba nüburtem aser Northeast tesem ajunga kanga ajangzüksü, ta ashi.



*Aor Oshi, Kenozülu aser Mulungzüng Sobaliru Onük nung Kenü Ali Kintem Mungdang Sentong*

**(ONE DAY INTERNATIONAL CONFERENCE ON "LANGUAGE, LITERATURE AND ORAL TRADITION OF THE AO-NAGAS")**

**Organized by Ao Riju & Language Translation Centre (LTC), Fazl Ali College**

**Sponsored by Kohima Aor Pensioner Telungjem**

**REGISTRATION - 8:45am onwards**

**SENTONG TENZÜK (INAUGURAL SESSION)**

Anogo (Date): Chiteni (July) 31, 2024

Mapang (Time): 9:00am - 10:20am

Tesentepdak (Venue): Conference Hall, FAC

*Sentong Lenir* (Chairperson) - Prof. Pangersenla Walling  
Dept. of Linguistics, NU & Head of Language Division, Ao Riju

*Sarasademtsü* (Invocation) - Rev. Dr. Prof. Mar Pongener, Executive Secretary, ABAM

*Pelaa agizükba* (Welcome Note) - Wb. Limawati Longchar  
Executive Member  
Ao Riju

*Tayongzükba* (Challenges) - 1. Dr. Watijungshi, Tir, KAPT  
2. Wb. Marsanen Imsong  
Tir, Ao Senden

**"Naga Culture and Language: Synthesizing New Research"**

*Mungdang Okila* (Keynote Address)

Speaker - Dr Roger Blench

McDonald Institute for Archaeological Research  
University of Cambridge

*Tepela O* (Vote of Thanks) - Wb. S. Wati Ozükum  
General Secretary, Ao Riju

**MASANGYUNG (TEA BREAK) 10:20am - 10:35am**

**LOKMEDEM SENTONG (PLENARY SESSION)**

Mapang (Time): 10:35am - 12:35pm

Tesentepdak (Venue): Conference Hall, FAC

*Onir* (Moderator): Dr Lanurenla, Director  
Language Translation Centre, FAC  
Head of Literature Division, Ao Riju

*Züluyur* (Rapporteur): Dr Imnazenla  
Asst. Prof. Dept. of Political Science, FAC

**"Revisiting the Archaeology of Jungliyimti"**

*Lokmedem O Jembir* (Plenary Speaker): Prof. Tiatoshi  
Dept. of History & Archaeology  
NU

Paper Presenters:

- 1. **"Word Formation in Ao"** - Sb. Yimkotong S Aier, Research Scholar, NU
- 2. **"Narrative Strategies in Oral and Contemporary Writings of the Ao"** - Dr. Lemtila Alinger, Asst. Prof., Dept. of English, NU

**CHIYUNGBA MAPANG (LUNCH BREAK) 12:35pm - 2:05pm**

**TECHNICAL SESSION: 2:05pm - 4:05pm**

**Loknu Telemsa 1 (Presentation Hall 1): IQAC Office**

Mapang (Time): 2:05pm - 4:05pm

*Onir* (Moderator): Sb. Yimkotong S Aier  
Research Scholar, NU

*Züluyur* (Rapporteur): Dr. L. Imlinichet Imchen  
Asst. Prof. Dept. of Economics, FAC

Paper Presenters:

- 1. **"Examining the challenges and successes of Sunday school in teaching Ao language: A case study of CEM Duncan Fellowship, DABA"** - Dr. Resenmenla Longchar, Asst. Prof., Dept. of History ICAFI University, Nagaland

*(Maneni tapak 7 nung...)*

Ni Kuki-Zo MLA tem assembly session-i jaoktsü: CM Biren

**Imphal, Chiteni/July 25** (Agencies): Manipur chief minister N Biren Singh-i Brehostibarnü ashiba agi, pai taruba state assembly session atema Kuki-Zo MLA ter-prongla jaoktsü.

Manipur legislative assembly trokhuba atema Manipur renema aliba mapang CM-i iba osang ya sangdongogo. Manipur legislative assembly session July 13 nungi August 6 tashi agitsü renema lir

Osangbenertem den sensaksemba mapang Manipur CMN Biren Singh-i, telogjem aser teka amteper inyaktsü koda tongtibang iba indang lemsatapa liasü.

"Ni aser assembly ajanga parnok jaoktsü. Parnok (Kuki-Zo MLA) onok den adentsüla aser parnok den teka amteper inyaktsü atema onok renema lir," ta Manipur CM N Biren Singh-i ashi.

Minister ana densema Kuki-Zo MLA 10 taoba Manipur assembly ana nung medeni liasü. State nung aziutokshi lendong tulu adoker aliba ajanga parnoki iba session ana nung maden.

Assembly session pongububa koba February 28 nungi March 5 tashi mena liasü aser session pezübuba taoba küm August 29 nü minute 11 dak amenba sülen tembanga liasü, iba session anaprongla nung item MLA tem yagi shilem magi.

Manipur chief minister-isa, Ato Kilonser Narendra Modi den ajuruteptsü atema pa Delhi-i aotsü sentong aliba lemsatepogo.

"Ni Delhi-i NITI Aayog senden atema aotsü. Iba sülen chief ministers' conclave akatsü, kong ken o balala benoka sensak asentsü," ta Biren Singh-i ashi.

Paisa, "ni state nung tang tensa kanga mejungi kümer aliba indang benoktsü aser tangsa tang iba mangatettep tembangdaksütsü atema lenmang ka bushitsü. Iba ajanga telemteba tajung kabo bener arutsü ta ni temulung lema bilemer," ta ashi.

CM Singh-isa, Manipur kübok Jiribam district nung tatalokba indang jembikong Bodhbar aonung Borobekra nung ki tazüing ka rongtokja liasü.

**Meghalaya: Pressure groups tem parnok sasa MRSSA benoktsü**

**Shillong, Chiteni/July 25** (Agencies): Meghalaya nung pressure groups tekui, parnok sasa Meghalaya Residents Safety and Security Act (MRSSA) benoktsü nangzükogo, aser jenjang tapet magiba atema state sorkar aitsüogo.

Telok teku nung KSU, FKJGP, aser HNYF nungera densema lir aser parnoki ashiba agi, sorkari tanga state aser

Minister Conrad K Sangma aitsüogo. Iba telok yagi parnok sasa dang bendanger aayangertem asdanga aotsü aser parnok indang work permits aser tanga kuli kaketttem asadangtsü sentong aliba sangdongogo.

Parnoki ashiba agi, lisopurtem tejangraba kümzuka ayutsü atema state-i jenjang tesashi agitsü nungdaker.

(Tapak 6 nungi...)

2. **"Nature and Cultural Consciousness in the Poetic Works of T. Senka Ao"** - Dr. Talisenla Imsong, Asst. Prof., Dept. of Linguistics, NU
3. **"Deconstructing Meaning: An Analysis of Compound Word Formation in Poetic Mongsen"** - Wt. Wapangienla, Research Scholar, Hyderabad University
4. **"Mother Tongue (MT) a challenging factor in English pronunciation in the context of Ao learners learning English as Second language"** - Wt. Toshimenla Ao, Research Scholar, NU & Dr. Imlienla Imchen, Asst. Prof. Centre for Naga Tribal Language Studies for Tribal Language Studies (Kohima Campus), NU

**Loknu Telemsa 2 (Presentation Hall 2): A10**

Mapang (Time): 2:05pm - 4:05pm

Onir (Moderator): Dr. Limasenla Jamir

Asst. Prof. Dept. of Sociology, FAC

Züluyur (Rapporteur): Wt. Nuksungmenla Jamir

Asst. Prof. Dept. of History, FAC

Paper Presenters:

1. **"Dynamics of Language and Religion in the Context of Contemporary Ao Community"** - Dr. Arenkala Ao, Asst. Prof., Dept. of Linguistics, NU
2. **"History or 'doubtful stories': Baptist and Ao Oral tradition in Nineteenth Century Naga Hills"** - Dr. Arenmenla Jamir, Guest Faculty, Department of History & Archaeology, NU
3. **"Philosophical Reflections on the Communitarian Institutions of Arju and Tsüki in the Ao-Naga Worldview"** Dr. Karilemla, Asst. Prof., Dept. of Philosophy, Savitribai Phule Pune University
4. **"Values, Beliefs, and Cultural Authenticity: Understanding Society through the Medium of Literature with Particular Emphasis on the Ao Naga Tribe"** - Ms. Chibeni Merry, Research Scholar, The Assam Royal Global University, Guwahati
5. **"Revisiting tone alternations in Jungli-Ao"** - Dr. T. Tamsunungsang, Asst. Prof. EFLU, Shillong

**Loknu Telemsa 3 (Presentation Hall 3): Conference Hall**

Mapang (Time): 2:05pm - 4:05pm

Onir (Moderator): Wt. Maongienla

Asst. Prof. Dept. of English, FAC

Züluyur (Rapporteur): Dr. Moalemla Imchen

Asst. Prof. Dept. of English, FAC

Paper Presenters:

1. **"Preserving Ao Naga Ancestral Sites: Oral Tradition as a tool"** - Sb. Chubatoshi, Research Scholar, NU
2. **"Ao oshi nung metaphor aser simile amshiyim"** - Wt. Toshisangla, Asst. Prof., Dept. of Ao, FAC
3. **"Bridging the Digital Divide: Challenges and Opportunities in Natural Language Processing for Low-Resource Languages"** - Mr. N. John Kuotsu, Asst. Prof. Dept. of Computer Science, FAC
4. **"Aor Tar Yimsüyimpong"** - Wt. Repabenla, Asst. Prof. Dept. of Ao, FAC
5. **"Ao Milen: Vernacular Newspapers and the Rise of Cultural Consciousness in the Ao Naga Context"** - Dr. Bendangrenla, Asst. Prof., Dept. of English, FAC

**SENTONG TEMBANG (VALEDICTORY)**

Mapang (Time): 4:05pm - 4:45pm

Tesentepdak (Venue): Conference Hall, FAC

Sentong Lenir (Chairperson) - Dr. Imlirenla Walling

Asst. General Secretary  
Ao Riju

Kulikaket alemtsü (Certificate distribution)

Sentong nung adener ola (Speech from Participants)

Melepzüng (Concluding remarks) - Sentong Lenir

**MULUNGEN O**

21.09.1966

22.07.2024

*Asür Rongsenchila*

Ozü temeim Asür Rongsenchila la temang mejungi mapang tatsüka alidang aser la iba lima nungi pilar onok mangyim jashi nung alidang kija-kibong, kidang-kiyonger, arogo purtem, temarmedemer aser temeimertem shirnokisa onok dang meima sarasadem, nebo aser rongsen agi yaritepogo, nenok ajak dang onok kinungertemi kanga pelaba lemsateper. Nenok temeim aser teyari mapa tajungtem onok mulung nung teti alitsü. Tulusang Tsüngremi nenok ajak talubosa moajangma.

Onoki item dang ya kangasa pelaba shisemer :

1. Doctors, Nurses & Staff of CIHSR Referral, Dimapur.
2. Doctors, Nurses & Staff of Faith Hospital, Dimapur.
3. Diphupar Ao Senso Telongjem
4. Aotsür Telongjem Diphupar
5. Ongpangkong Senso Telongjem Diphupar
6. Mangmetong Senso Telongjem Dimapur
7. Mangmetong Senso Telongjem Dimapur, Diphupar Area
8. Diphupar Area Mangmetong Fellowship
9. Dimapur Longchar Kidong
10. Mangmetong Longchar Kidong
11. Ao Baptist Church Diphupar
12. Longkhum Baptist Arogo

- Temeim Kinungbo &amp; Kinungertem.

**Pelaba Lemsateper**Lt. Mrs. REPALILA LONGKUMER  
01.09.1962 - 06.07.2024

Onoki teti meima aliba asür Repalila Longkumer (Longsa) shirang yipden nung alidang nungi akümüli wadang tempang tashi nung nenok kija, kibong, medemer, kiyonger, yimer-yimsanger, doctor, nurses C.I.H.S.R Hospital Dimapur, Arogo aser lokti balala-i nübo, rongsen aser sarasadem agi tanü tashi ozü kibong yariba asoshi ozü kibongi nenok ajak dangi tsüngdong arua kanga pelar ta meshitetba atema kanga sasar.

Onoki nenok nem kecha meyipa magütsüteter saka nenok temeim mapatem onoki kodanga mamatsü, anungji asen Tsüngremi nenok kija, kibong aser lokti ajak molamoshia moatsütsü ta ozü tamang sarasadem.

Temeim Kinungbo, Jala jabasotem,  
Semchi-semnur aser Kinungertem.**Democracy kumzüka ayutsü mechi US tir atema metokteper: Biden**

Washington, Chiteni/July 25

(Agencies): US Tir Joe Biden-i America nunger dang television ajanga jembidang US democracy kumzüka ayutsü mechi US tir election nung tanaben tokteperba anentsü telemtetba agi, ta ashi.

Arishi küm 81 tain Biden-i ashiba agi, tir ka ama pai inyakba record tem ajanga pa kümsük tanabuba atema temsüa lir ama bilemer, saka asen democracy kumzüka ayutsü atema kecha agia menokdangtet.

Külem Democrats aser linük lungjemtsü asoshi ni US Vice-President Kamala Harris yaritsü ta pai ashi.

Party nomination atema Harris nem lenmang lapokja

July 21 nü Biden-i US tir election yutsüba sülen yashi White House nungi jembiba ya pa yimjak nung temai adokba mezüngbuba liasü.

Republican telok nungi taoba US tir Donald Trump den June ita o intepba mapang Biden-i shilem junga magitetba sülen pai ano kümsük ka US tir meinyaktetsü südi ta tamang makateti külem tenzüker aser senotsü agi yarir temi ajungshia aru.

Pai nübuyim nung benjaba mesüra pa temang nung tashi meiti akumba aser tekolok shisatsü ajema akumba indang kecha süoka mejembi, saka item indang ya ita aika nüburtemi jembia aru.

(Maneni tapak 8 nung...)

### Paris Olympics 2024, Archery: India tetsür team quarter-i iogo

**Chiteni/July 25, 2024 (Agencies):** Taküm mezüngbuba Olympics nung asayala Ankita Bhakat-i, Deepika Kumar amala asayar tejen dang nungi tajungba asayateta Paris Olympics' tetsür individual recurve qualifications nung 11buba nung tembangogo. Brehostibarnü pezübuba nung tembangba sülen India tetsür team iba asaya nung quarterfinal-i iogo.

Qualifications nung arishi küm 26 tain Ankita-i India tsürtem rongnungi point timtiba ngiteta lai point 666 angu aser la sülen Bhajan Kaur (22buba; point 559) aser Deepika Kumari (23buba; point 658) na liasü.

Team asaya nung India team-i point 1983 ngua

pezübuba nung tembang. South Korea team ajak dang temaba jenjang nung liasü aser parnok sülen tanabuba nung China aser tasembuba nung Mexico liasü.

Qualifications sülen temaba jenjang nung tembangba team pezü quarterfinals-i indang indanga aier aser jenjang 5buba aser 12buba tsüngda nung alirtem Round of 16 asayar.

India team quarterfinals nung France aser Netherlands na rongnung ka den asayatsü.

Quarterfinal koktetera parnok semifinal nung South Korea den asayatsü.

Korea tetsür team-i Olympics nung kanga junga asaya arudar aser parnoki küm asem tejakdang Tokyo

nung iba asaya tekubenbuba atonga kokogo.

Individual section nung Korea tsür Lim Sihyeon-i point 694 ngua world record ka yanglu aser la temaba jenjang nung liasü. Kasa mapang nung Korea tsürsa Suhyeon Nam-i point 688 ngua la tanabuba jenjang nung aser China tsür Yang Xiaolei (point 673) tasembuba jenjang nung liasü.

Ranking round ya tarep temeyoktep asaya atema-a qualification asütsü, aser temaba jenjang nung tembangba team 16 dang qualify asütsü.

Tarep temeyoktep asaya nung Ankita teburtemrongnungi qualification nung temaba jenjang nung tembangba asayar den külemi asayatsü.

### Villa winger Diaby Saudi-i aotsü renemer

**Chiteni/July 25, 2024 (Agencies):** Aston Villa winger Moussa Diaby, pound million 50.4 yong Al-Ittihad-i aotsü ana nung lir.

Arishi küm 25 tain asayar ya medical test agitsü aser tenangzüktepba tembangba jembishinütsü atema Saudi Arabia-i ogo. Pa Aston Villa nungi küm ka asayaba sülen tang Saudi-i aotsü telemtetba agiogo.

Diaby ya taoba küm Bayer Leverkusen nungi pound million 51.9 yong Villa nung arua aden, koba club-i sen timtiba intoka asayar ka alizükba liasü. Ajisüaka manager Unai Emery-i pa yoktoktsü telemtetba agiogo.

Club-i Jaden Philogene Hull nungi tanaben alizükshiba sülen tang iba jenjang ya agiogo. Philogene ya iba ita pound million 13.5 agi alizükogo aser pai club nem teyari tulu

agütsütsü ta amanger.

Diaby, Villa nungi 54 ben asayaogo aser iba mapang goal 10 idaktsü. Villa pur Premier League nung jenjang pezübuba nung tembangba Champions League atema qualify asüba nung pai teyari tulu agüja liasü.

Villa pur season tasenba atema team yanglushiba mapang parnoki midfielder Douglas Luiz taoba ita pound million 42.4 yong Juventus dang yokogo.

Parnoki Juventus nungi Samuel Iling-Junior aser Enzo Barrenechea na alizükogo aser left-back Ian Maatsen, Chelsea nungi pound million 35 agi alizükogo. Villa-isa, Everton nungi Lewis Dobbin pound million 9 shi yong alizükogo.

Maneni Mongolbarnü Villa-i Everton midfielder Amadou Onana pound million 50 agi alizükogo.

### World No. 1 Jannik Sinner Paris Olympics nung masayatsü



**Chiteni/July 25, 2024 (Agencies):** Tebur tennis asayartem rongnung temaba jenjang nung aliba asayar Jannik Sinner-i Bodhbarnü pa Paris Olympics nung shilem magitsü atema telemtetba agiogo. Pa tonsillitis agi timtem agüja shirang tenzükba sülen iba telemtetba agia liasü.

Italy nunger asayar yagi ashiba agi, iba asayamung nung shilem magitetba atema pa kanga jashir aser tezüadanger. Paisa, pa Monaco nung training agia aliba mapang Hombarnü nungi temang mejungi aküm.

“Doctor den Mongolbarnü ajurutep aser temang tajungba

kümtisü ta bilema anogo ka talila atdangba sülen ni temang tajungba makümer aser tia maka tamajungba ang kümogo,” ta Sinner-i ashi.

“Ni kü teammate tem aser tanungba Italy team den tokteptsü atema kanga yongyaseta ata liasü, saka iba ya ataloktsü atema atatsüsa akümtsü.

“Kü indang medical team-i tuyuba ama ni mapang tatsüka anisüngzüksü aser taneptsü bushitsü. Iba asayamung nung Italy team-i junga asayatetsü imlarja atar aser tarutsü nung tashi taitba meyipa arutsü imlar atar,” ta pai ashi.

Sinner-i ashiba agi, taküm Olympics nung asayatsüji pa nükjidong tongtibang rongnung ka liasü aser pa tebur kija asaya nung aser tarep asaya nunga Lorenzo Musetti den külemi asayatsü liasü.

Pa masayatetsüsa akümiba sülen tebur tarep asaya nung Wimbledon semi-finalist Musetti, Luciano Darderi mesüra Matteo Arnaldi na ka den külemi asayatsü.

Italian media sangdong balala ajanga ashiba agi, kija asaya nung Sinner melen Andrea Vavassori asayatsü, shiba jenjang 207buba nung lir.

Sinner-i pa career nung mezüngbuba Grand Slam taküm Australia Open nung akok aser iba sülen French Open nunga semifinal tonga asayaba sülen pa Italy nunger asayartem rongnungi world rankings nung temaba jenjangi atuba mezüngbuba asayar aküm.

Pai taküm tang tashi nung asayamung asem koka lir, kong Miami nung Masters 1000 asayamung ka akokba densema lir.

### BENDANGLI OSANG : Tapak 7 nungi...

#### Democracy kumzuka ayutsü mechi...

Opinion polls nung tang tashibo Harris jenjang junga sayur aser la nominate süra taoba tir den kanga junga tokteptsü amai ajiteter.

“Ni iba office kanga meimer aser akumtsübor, saka ni ozü linük tali meimer,” ta shia tiri pa o tenzük.

Pai Oval Office nungi minute 11 shi jembiba aser iba mapang pa kinungtsü Jill, jabaso Hunter aser jala Ashley nunger den tongtipang White House staff kar takdang nung liasü.

“Ni putu tasen nem milen amoktsütsü telemtetba tajunglen nungi agiogo. Asen linük lungjemtsü asoshi ibai lenmang tajungtiba lir,” ta nübur tenzükba mapa nung century tasadang ka dak tema inyaksang Biden-i ashi.

Pai taruba küm January ita pa indang kümsük matemdangsa America nübur asoshi mapa renemtsütsü nangzük aser arishi küm 59 tain Harris ya mapa tashi, tashi tait aser tetemsü külem tenzük ka lir ta ashi.

“America nung jangratemsüji, yangi chuba aser dictators temi yimsü masür. Nübur temi yimsü asür. Nenok kabu nung puti otsü lir. Nenok kabu nung tashi lir.”

Arishi küm 78 tain Trump-i Bodhbar aonung pa indang social media sapang Truth Social nung ‘tiri jembiba junga mangatet aser kangasa majung liasü,’ ta ashi.

Bodhbarnü Charlotte, North Carolina nung nübuyim sentong ka nung jembidang Trump-i Harris aser Biden dak tenük yoker aija jembiba aser Biden ya US puti otsü nung tir

tamajungtiba lir ta ashi.

“Küm asem ser tasadang tiazü jembir Kamala Harris ya Biden-i aibelen mapa inyakba ajak nung ‘ultraliberal driving force’ ka ama aru,” ta pai ashi.

“La ya radical left lunatic lir aser office nung amentsü maongka angunungbo lai asen linük samatsütsü.”

Bodhbarnü White House nung osangbener den jembidang Biden ya temang majungba agi linük tir asoshi tokteptsü nungi anener masü, ta press secretary Karine Jean-Pierre-i ashi saka tejangja rasaa mashi.

Harris ya kanga meranga nübu yima jajaba mapang lir. Bodhbarnü lai Indianapolis nung akhi mapang nungi sentsü tanak Zeta Phi Beta sorority den jembidang la asayamentüa nübuyimer masü ta ashi aser la shimtsü asüngdanga liasü.

“Tang asen linük asoshi mangdang ana tsüngta asenoki shimtsü tensa ka nung lir, kati tarutsü nung rangloker aser kati tesüba nung rangloker. Aser nenok teyari nung ni asen linük tarutsü atema rarar,” ta lai ashi.

La ya November election nung US tir inyaktsü shimtetra, sentsü tanak, South-Asian American aser tetsür tir mezüngbuba akumtsü.

Ajisüaka activist telok Black Lives Matter ajanga sangdong ka Mongolbarnü agütsüba nung Democrats temi Black voters mashi lenmang nung anisatsü meranga Harris ya anioker ta ashi.

Republican telok nungi lenir aikati Biden dang tir menden nungi tangsa alutsüla ta ashir.

### Nuwan yiruba ajanga India den T20I masayatetsü

**Chiteni/July 25, 2025 (Agencies):** Training mapang temeyong yiruba sülen Sri Lanka nunger pacer Nuwan Thushara, India den T20 International asem asayatsü aliba nung shilem magitetsü.

Bodhbarnü training nung fielding amenba mapang arishi küm 29 tain asaya ya teka tabelen nung jembsüba yirua liasü, ta PTI sangdong ka ajanga metetdaktsü.

Pa ball aonba teka masü saka tabelen temeyong yiru, ajisüaka pa kanga mejungi yiruba ajanga Twenty20 Internationals asem asayatsü aliba nung masayatetsüsa kümogo. T20 asaya ya

Pallekele nung Honibarnü tenzüksü.

Thushara yiruba sülen pa melen külem pacer Dilshan Madushanka shimogo.

Thushara yiruba ya asayamung ayongzuka asayaba linük asoshi takoksa tulu asütsü. Pa tawa kanga junga asaya arudar taoba ita asayaba T20 World Cup nunga team nungi pai wicket timba agia liasü.

Pai World Cup nung asaya asem nung wicket ti agi aser pa indang economy rate 5.62 liasü. Asaya ka nungbo pai run 18 agütsür wicket 4 agi.

Kasa mapang nung Asitha Fernando-i Dushmantha Chameera melenogo, shiba

shirangba ajanga masayatetsüsa kümogo, aser iba asayamung nung masayatetsüsa akümiba Lanka nunger pacer tem rongnung Thushara ya tanabuba asayar kümogo.

Iba asayamung atema Sri Lanka squad: Charith Asalanka (c), Pathum Nissanka, Kusal Janith Perera, Avishka Fernando, Kusal Mendis, Dinesh Chandimal, Kamindu Mendis, Dasun Shanaka, Wanindu Hasaranga, Dunith Wellalage, Maheesh Theekshana, Chamindu Wickramasinghe, Matheesha Pathirana, Dilshan Madushanka, Asitha Fernando, Binura Fernando.

**BILEMDANGANG**  
 “Na kechi agi langa ali aji metetdang.”